

BON DIA Aruba
www.bondia.com

• Deporte • Social • Suceso • Cultural



Red ta introduci Nadya van Putten, su candidato pa Parlamento Europeo

“Nos mester di hende na Europa cu conoce nos pais”

Fundacion Elsa Coffi ta reconoce esfuerzonan di Mike Eman y Benny Sevinger

ORANJESTAD—“Mi no ta un politico pa Aruba, sino un politico Hulandes.” Nadya van Putten di e forma aki a introduci su mes como candidato number 5 riba lista di e partido Groenlinks di Hulanda, pa eleccion di Parlamento Hulandes.

Van Putten ta na Aruba pa introduci su mes, pa asina haya e sosten di comunidad pa su partido Groenlinks den e eleccionnan cu ta programa pa Juni 9 proximo. Van Putten no ta un candidato di Red cu ta riba lista di Groenlinks, pero ta un politico profesional cu ta representa e partido socialista/ambientalista den e municipio di Rotterdam, pa asuntonan di Cultura, Enseñansa y Hubentud.

Partido Red, manera ta conoci, a sera un alianza pa sostene Groenlinks den eleccionnan pa Parlamento Europeo, y como tal a sostene e candidature di Nadya van Putten, Dr. Rudy Lampe a bisa. E motibo principal ta cu Red ta mira e importancia pa Aruba tin un ‘pia’ den Union Europeo, ya cu e aña aki tur sosten di Hulanda pa Aruba lo termina.

E ta sostene e pensamiento di Prome Minister Nelson Oduber, cu Gabinete Eman Tres a yega na un acuerdo pa termina e ayudo pa desaroyo for di Hulanda pa Aruba na 2009, sin cu a laga Parlamento tuma un decision riba tal. “Prome Minister a bisa cu e ta lamenta cu nos no lo haya mas ayudo di Hulanda.” Sin embargo, awor e decision tey, y mester busca otro forma, y den esaki Europa ta e contesta.

INFORMACION RIBA UNION EUROPEO TA CRUCIAL



Nadya Van Putten ta na Aruba pa introduci su mes, pa asina haya e sosten di comunidad pa su partido Groenlinks den e eleccionnan di Parlamento Europeo cu ta programa pa Juni 9 proximo

Pa tal motibo mes, Fundacion Elsa Coffi ta organizando un anochi informativo na Universidad di Aruba, otro siman Diamars, Maart 24, unda lo amplia riba e nificacion di Union Europeo pa Aruba. Segun Presidente di e fundacion, un hala di Red, esta John Djaoen, Aruba ta pertenece na Union Europeo. Es mas, Hulanda ta un di e paisnan fundador di Union Europeo, cu a inicia den forma di e Comunidad Europeo pa Carbon y Staal. Pero, pa tur e temponan aki, tabata Hulanda cu a tene Antiyas y Aruba den scuridad riba e posibilidadnan y derechonan cu Union Europeo ta brinda e ciudadanonan Hulandes den Caribe.

“Den e ultimo decananan,

cu e aperture den fluho di informacion y noticia a bira dificil pa keda tene poblacion di Antiyas y Aruba ignorante, di kico Union Europeo ta. Hopi di nos mandatarionan den pasado y presente tabata sa hopi mas di Union Europeo cu nan tabata laga sleek Pa nos no bira sabi y cuminsa haci pregunta,” Djaoen a bisa. “E falta di informacion y falta di aplicacion di derecho ta duna nos e impresion cu nos ta ciudadanonan di segunda of tercera clase tanto den Reino como den Europa.”

Y un di e derechonan cu nos a keda priva di dje pa hopi tempo tabata e derecho di voto pa Parlamento Europeo. John Djaoen a duna reconocemento na Mike Eman y Benny Sevinger pa trece un cambio

den e desaroyo aki.

“Por fin, dos ciudadano di Aruba a dicidi pa reta Hulanda legalmente. Nan a cuminsa un caso den corte contra municipio Den Haag cu a nenga di inscribi nan como votado pa eleccion di Parlamento Europeo. Mike Eman y Benny Sevinger a gana e caso aki, di moda cu awor nos como Hulandes den Caribe tambe tin derecho di vota pa Parlamento Europeo.” Djaoen a bisa cu te hasta tin dos Arubiano cu a postula nan mes como candidato pa e Parlamento ey. Nadya van Putten ta un, y como tal, e lo dirigi e anochi informativo na Universidad, cu su tema ‘Kico Union Europeo ta nifica pa Aruba.’

POSICION UPG TA UN PELIGER PA ARUBA?

Mientrastanto, e siman aki durante e ceremonianan na ocasion di Dia di Himno y Bandera, Prome Minister Oduber a bisa cu e status di UPG no ta bon pa Aruba. Es mas ta opinion di e partido mayoritario na Aruba cu e hecho cu tanto Red como AVP ta motiva hendenan pa bay vota pa Parlamento Europeo ta dunando un mensahe robes. Ademas ta Hulanda lo ta pushando nos isla den un direccion di UPG, algo cu nunca a scohe pe.

Pa Rudy Lampe, e pensamiento aki ta ilustra cu Prome Minister Oduber ta demostra cu e no ta compronde e materia. Den e raport di e consejo mas halto di Reino, esta Raad van State ta muestra cu tin cuater tipo di relacion posibel entre Union Europeo y Aruba. Tin diferente forma di relacion posibel, y un ta UPG. “Pero

no necesariamente ta e unico forma. Nos di partido Red den nos statutan a laga tur e diferente posibilidadnan habri. Na di dos luga, vota pa Parlamento Europeo no ta nifica vota pa UPG. Locual ta e asunto ta con nos ta organiza nos mes den Reino Hulandes. Union Europeo no ta mete den asuntonan di e paisnan miembro. Reino Hulandes ta miembro di Union Europeo y no Hulanda. Rudy Lampe a sigui bisa cu si nos paisnan ta hayando menos autonomia ta asunto interno di Reino Hulandes. “Aki Prome Minister ta bruha cosnan cu no tin nada di haber cu otro. P’esey nos ta kere cu ta importante pa splica e diferente argumentonan.”

Nadya van Putten a muestra ademas cu e areglo actual di LGO ta terminando. “Na 2010 el a caba.” Y den caso cu Aruba berdad kier continua cu e areglo aki, cu ta cay bou un tratado, awor caba mester cuminsa negocia cu Union Europeo. “E ta un opcion realistico, pero e mester pasa prome.”

UNION EUROPEO COMO ALTERNATIVA PA HULANDA

Mirando cu e aña aki lo ricibi e ultimo pago pa FDA for di Hulanda, Red ta di opinion cu mester tira bista awor riba e fondonan pa desaroyo cu tin den Union Europeo. Di e forma aki por sigui ricibi fondonan pa desaroyo di Aruba. “Y si Hulanda ta sera porta, nos por habri e kranchi di e fondonan di Union Europeo. Y unda ta dicidi riba e fondonan di Union Europeo? Den Parlamento Europeo. Ta eynan ta dicidi

Continua A/15

riba e presupuesto Europeo y ta p'esey ta importante cu nos tin un representante ey den, pa defende interes di Aruba, pa nos por sigui haya mas fondo."

Berdad ta cu ya Aruba a haya fondo di Union Europeo, entre otro pa Fundacion Parke Nacional Arikok, pero e posibilidadnan aki ta keda limita. "Tin hopi mas fondo disponibel, pero mester habri e posibilidad legal pa Aruba por yega na remarke na esakinan. Mester habri e kranchi mas ainda."

Den e sentido aki, mester tin un stem cu ta papia na interes di Aruba ora cu Parlamento ta tuma decisionnan riba e fondonan aki. Lampe ta enfatisa cu esaki ta necesario, pa muestra Europa "cu nos no ta e pais mas rico, cu nos Producto Bruto Nacional no ta esun real." Van Putten di su banda a bisa cu e fondo for di cual a ricibi placa pa Parke Nacional Arikok ta caba na 2010, y aunke tin sumanan disponibel ainda, Aruba no a tuma pasonan concreto ainda pa haya parti di esakinan.

Mescos cu Rudy Lampe, Nadya van Putten ta considera cu Aruba tin posibilidad pa haci uzo di e fondonan Europeo, pero cu mester muestra si cu e Producto Bruto Nacional, nos GDP, no ta mes halto cu e documentonan ta muestra. Hopi di e cifranan ta infla, pa motibo cu hopi entrada di turismo registra pa Aruba, nunca ta yega e isla. "Ora cu adapta e



Partido Red, manera ta conoci, a sera un alianza pa sostene Groenlinks den eleccionnan pa Parlamento Europeo, y como tal a sostene e candidature di Nadya van Putten, Dr. Rudy Lampe, lider di RED a bisa.

cifranan, e ora si nos por bin na remarke pa fondonan di desaroyo Europeo. Y mester tin un hende na nivel Europeo cu por papia di esaki."

DELIBERACION Y COALICION

Rudy Lampe ademas a sigui muestra cu contrario na politica local, decisionnan den Parlamento Europeo ta basa riba dato y informacionnan, y na e momentonan aki no tin ningun informacion di Aruba.

"Mas di 70 porshento riba Relacionnan Exterior, no ta cay na Den Haag mas, pero na Brussel. Apesar cu nos Statuut ta bisa cu Relacionnan Exterior ta asunto di Reino, mas y mas esaki ta determina pa Union

Europeo."

Y tumando e relacion cu Venezuela como ehempel, un representante di Aruba den Parlamento Europeo lo por duna bista mucho mas amplio y completo con e relacion aki lo mester ta.

Na e momentonan aki, paisnan manera Alemania, Francia, Spaña berdad tin un peso den decisionnan, pero cu un stem di Aruba, e decisionnan aki lo ta mas 'completo.'

"P'esey nos ta kere cu un hende por haci un diferencia, unda ta duna informacion veridico, por ehempel di e relacion cu Venezuela."

Nadya van Putten a sostene e

pensamento aki, esta cu como un pais chikito, por haci uzo di e paisnan miembro grandi pa logra miho areglonan pa Aruba tambe. Por uni cu Francia, Alemania etc y negocia asina cu companianan manera Shell of otro, pa logra beneficiacion pa Aruba tambe. Como isla isola, lo no logra mucho. "Nos tin e lazonan historico cu Europa. Pakico no uzanan." Y contrario cu na Aruba, unda mester di solamente 11 pa tuma un decision, na Europa, politiconan y spesificamente Parlamentarionan Europeo ta consiente di e importancia pa traha den coalicion.

"Ami na Rotterdam, ta traha libremente cu coleganan di PvdA, CDA y otro. Ta imposibel pa no traha cu nan, na un forma

respetuoso. Y ta na e mesun forma ey ta traha den Parlamento Europeo."

Es mas, e grandura di Parlamento Europeo cu tin como 750 miembro, ta obliga e Parlamentarionan y politiconan pa traha hunto pa yega na ideanan comun, y asina logra lo maximo pa nan paisnan. Pues, trahamento den coalicion a base di ideologia, idea y argumento ta e norma, tanto na Hulanda y sigur Union Europeo. "Nos mester di hende na Europa cu conoce nos pais, nos asuntonan."

Finalmente Rudy Lampe a muestra tambe cu contrario na e pensamiento di Prome Minister Oduber, Red ta kere cu ta pueblo mester dicidi ki lazo Aruba kier cu Europa. Den e sentido aki, Red ta kere cu mester tin un referendum pa pueblo expresa su deseo.

Y no manera Prome Minister Oduber a haci, esta di djis manda un carta pa Gobierno di Hulanda, expresando cu Gobierno di Aruba no kier un UPG. "El a haci mesun cos cu Gabinete Eman, esta tuma decision pa Aruba sin aprobacion di Parlamento, sin consulta pueblo."

Diadomingo awor, partido Red lo organiza un evento special na Bonaire Club, di 11'or di mainta te cu 2'or di merdia, pa motiva ciudadanonan registra pa vota pa Parlamento Europeo. E unico exigencia ta cu mester tin un copia di i.d of paspoort valido.